

四庫全書

集部

欽定四庫全書

集部
江湖小集卷十五至
七

詳校官中書臣張姚成

助教臣常循覆勘

覆校官主事臣龔敬身

校對官助教臣胡子襄

謄錄監生臣任兆炯

欽定四庫全書

江湖小集卷十五

宋 陳起 編

陳鑒之東齋小集

送鄭嚴州四首

之梯

諸賢遠江海梧竹孤鳳吟願言正王度祈招嗣清音亦
為膠西董反慰及物心未可賦柏舟天眷宗社深
父老迎使君舟楫桐江波那知使君心一片烟雨蓑杖
藜對客星清風雙嵯峨沙鷗公故人應為小婆娑

巖山少平田巖俗稀惰民書生坐黃堂肯說劘刃新定
以清淨化坐嘯物自春綠野人荷鉏使君聊岸巾

善端誰獨無所化有蘭鮑時容拜床下孺子似可教山
川頓脩阻心折東去棹徘徊隄柳春帆腹風欲飽

遣興

踏遍苔谿石梅花又滿林山川春入望宇宙月知心一
紀別鄉井八年無鴈音危巢老松頂日暮有歸禽

會稽秋日觀山

荒塍間流水蠹葉風颼颼前山與幽人亭亭共清秋遠
近日明晦隱見雲去留木末一叟歸犬鳴茅舍幽憶昔
典午東劍佩森名流勝地慰遠懷茲焉久綢繆漁磯與
樵逕今有斯人不池石老苔髮空餘羸蚌遊世有古今
異郢歌聊自酌醉眼時摩挲此山即前修

過吳江

垂虹四年別綠綠來夢境今晨整芒屨柳風吹髻影春
光徹重淵蛟困淥波靜遠帆有無處小立為徐領浩歌

翁自得白髮亂垂頸一室世誰如三萬六千頃平生卜
隣意此際味差永翁肯平分與吾其辨漁艇

暮登蓬萊閣

危闌散湮鬱已暮亦登臨鼓角孤城月山川萬古心鶴
棲松霧重鷗臥渚烟深客子終何托婆娑且醉吟

秋晚

瘦盡芙蓉菊又殘客遊懷抱更登山秋光老矣歸何處
只在愁人雙鬢間

晚登京口倅廳富覽二首

窮途逢偉觀小閣江萬里薄暮岸幅巾寒烟四山起天
河注平淮斗柄卧蘆葦欲返還少留燈青客船尾

孫劉昔虎視鐵騎如風雷白水列蒼幃今焉侑予杯功
名詫一時空雲暫崔嵬衲子真英雄一龕老巖隈

古詩四首奉寄陳宗之兼簡敖臞翁

雌雄烏一色烈焰玉石焚子桑十日雨英槩君摩雲塵
尾失羈思襟裾蘭茝芬是豈如蹙驢書圃同鉏雲

君隱萬人海嘯詠足勝流我墮寂寞濱嵌巖一節秋蟠
鬱向誰吐天圍蘆荻洲劈箭客帆去何日回吾舟

甘旨娛母顏雍雍春滿室咿啞索梨棗諸兒爭遶膝波
明再茁桐露滴清吟筆人生如此足富貴刀頭蜜

亭亭會山閣四面秋澄鮮盤礴一代英披衣俯飛鳶邇
來幾星聚清尊壓雲煙九轉得竒訣分惠母獨仙

西湖晚望

過雨長隄葱翠濕小橋人靜支笻立一縷竿頭顫霜鯽

風動青蒲見蓑笠

京口江閣和友人韻

良辰仍我輩斗酒大江邊
小閣納萬里一帆來九天
世塵黃鵠外詩興白鷗前
地勝吾衰矣長懷李謫仙

題鄭承事所作蕙蘭三首

蘭如君子蕙如士此評吾得之
涪翁有餘不足姑勿論
畢竟清幽氣類同

托迹不辭巖谷深異於蕭艾亦何心
清風披拂自多事

斜日淡雲香滿林

鄭君欲與蘭寫真心神暗與蘭俱春詩家三昧正如此
境融意會今何人

晚涼湖邊放步

暑氣湖山薄晚風巾袂涼蟬鳴便柳蔭鷺立領荷香大
舸鼓聲沸小軒茶味長獨遊元更好細細踏斜陽

有感

淋雨何人記子桑朱門車馬漲塵黃百年友誼須英槩

畫虎何妨效季良

月下見桂花欣然會心賦二十八字

萬卉千葩春事足一巖桂自壯秋光清冷風露月侵午
天上人間相對香

同劉叔泰放步湖邊入靈芝寺坐依光良久叔
泰誦坡仙好把西湖比西子之句子因賦古風

一首

劉郎喚我出勝處意所便清寒柳桃風濃淡杉檜烟僧

廬自生香步遶古佛前依光偶不局坐數禽聯翩平林
度清磬遙隄族歸船湖山露真態鷗點溶溶天形容幾
吟筆剛道妝抹妍莫作西子看正如姑射仙相知喜值
予微笑生清連

探梅

驢蹇颯寒獵帽袞吟肩山聳酒微醺彎彎竹逕霏霏雪
小小溪橋淡淡雲忽邂逅時真得侶向空濛處細飄芬回
天力量知誰似笑挽春來首策勛

再到京口

問訊金焦七恙否雙鰲依舊據寒流
增邊浪戰嵌巖石木末雲扶縹緲樓
楓葉蓼花新醉雨山容客鬢兩添秋
海天一鏡舟如豆忘却塵緇季子裘

與客夜飲蠟燭有花客請賦之

圓蒲促坐話情真蠟炬能花似有神
畢竟蜂鬚膏馥在酒邊依舊十分春

蔣實齋出示孟浩然畫像因賦二絕

吟鞭遙指鹿門歸水色山光件件詩縮項鱖魚元自好
當年應悔識王維

誦詩縱不忤龍顏榮貴無過是好官未必一僮隨瘦馬
千年傳作畫圖看

送方粹仲適會稽

正好鑪亭語夜分朔風征帽浙江濱天低雁帶叅差樹
山遠舟橫黯淡雲龜解不妨時換酒鯨喙元自妙為文
千出萬壑心如水二尺檠邊剩著勛

到三聖廟坐池亭久之記以四十字

倦踏軟塵陌琳宮取次行紅桃窺瀲灩翠柳立虛明
眼底得詩料耳根猶市聲黃冠邀啜茗猶有舊交情

同潘孔時飲總宜園孔時出寶晉數帖呼道人
吹簫次日有詩予用韵答之

六橋秋新宜醉吟舉杯共聽巖鶴音危亭三面立老竹
寶晉數帖清人心涼蟬不敢喧夕曛洞簫聲繞山腰雲
摇摇歸艇水紋裂山紫天青河漢白想君獨立對空濶

一鷺毛寒藕花月

包家山和潘孔時

危闌納納萬里天此景不作西子妍
荒谿斗折喬木末小亭碁布層厓巔
陽侯作意娛我醉潮頭百尺來樽前
游蜂低徊帶花露一鳥急去拖林烟
年來祇可作橋隱四人聊學商山仙

送陳仁叔之越

生世可無友吾友得仁叔行已嚴
尺度色夷氣清穆蠅

頭觀世態塵尾露心曲大江渺愁人風欲飽帆腹重陽
兩日是不共一杯菊吾儕跡浮萍同是客京轂作計俱
出此正爾未免俗倘有廩可指一笑如魯肅寒窗共短
檠何用我征軸所以窮杜陵恨欠突兀屋波寒淨沙石
露重老林木莫言衣帶水後會殊未卜越山君舊遊我
亦曾寄目邇來平安否細與問脩竹

寄題長溪楊耻齋梅樓樓乃其先世讀書之所
乃翁愛書書滿樓萬軸挿架堪汗牛乃翁愛梅梅遶樓

千年老幹如蒼蚪，梅護羣書俗塵絕。書對梅梢滋味別，
有時掩卷靜倚闌。簷角一枝擎淡月，鴈行編簡相從久。
筆研收功竟無負。

後登進士
第第右科

兒孫登樓凜生敬，謂此梅

花乃先友一新丹。馱煥枿棋黃卷依然對，姬孔汲泉不
是灌梅花培養。君家讀書種袍香，青紫雲路同盛事。何
翅繼乃翁後來，應有跨竈者。百花頭上文正公，吾知乃
翁好梅意不獨。區區為名第，霜颯天地慘無色。誰得東
皇第一義，惟梅氣稟獨超卓。首送春風入書幄，對之心

地悟理學此是天民尹先覺

春晚野步

容易老春工扶藜趣好風蛙跳蒲細細燕沒絮濛濛
酒亦可醉有懷誰與同長松古鬚鬣無語對繁紅

客新安賦喜雨歌呈守令倪使君

良苗正要雨肥綠火傘張空驅日轂枝頭忽作少女風
轉眼排檐萬銀竹為新安民殊可憐挿空亂巘無多田
雨纔終日水半壁方晴又望霓橫天是邦若要宜稼穡

好似嬰兒調乳食祇令田甫渴甘澍賢侯憂民見顏色

鼓聲坎坎神來臨不歆牲酒歆侯心

土神注王甚靈使君禱之得雨睡

龍蘇醒聽約束拏攫雲霧層厓陰澗泉將涸兮亂流嘉

穎欲槁兮光浮田翁戴笠兒跨牛欣欣相對歌賢侯爭

言一雨神所賜非侯何以蒙神休天惠賢侯福吾土長

是五日一風兮十日一雨

守叁和張倅古巖詩予用韵賦三絕呈守叁

天然石屋兩三僧趺坐寒雲几上生想見瓦鑪烟斷處

一函經對萬松清

貳車林下喜逢僧
眼底千峰逸興生
五馬未遊心已到
吟牋零亂岫雲清

淡泊賢侯似衲僧
功深心地棗梨生
畫堂歌舞聊娛客
客退依然禪榻清

題問政山

于方外兄德誨為新安太守於郡之東山築
屋以居方外號為問政山房

憑軾邦君侈畫熊，却來問政翠崖翁。祇應兄念元真子，
不是堂無齊蓋公。千載棟華垂盛事，兩叢慈竹亦清風。
跨鸞時過宣平老，明月簫聲在半空。

守空示予遊問政山和陳廣文詩予用韵呈守

空

小隊名山訪古歸，雪雲不解聽招麾。瓊瑤千嶂挿空澗，
珠璧一詩爭岨竒。興逸聊茲遊赤石，民安何待化潢池。
妓圍如畫心如水，鬢髮從渠映玉碑。

玉碑見
盧全集

夏夜

鵲影翻高樹螢光出淺莎
墻低天宇濶樓小月明多
清吹徐徐至微雲緩緩過
欲談無與共默坐養天和

題陳景說詩藁後

今人宗晚唐琢句亦清好
碧海掣長鯨君慕杜陵老
月明孤嶼雲一鶴喚清夜
和之以君詩竹牖寒燈下
倚馬揮萬言跨驢哦一字
遲速不須論紉雲看竒思

和守空戶部家居書懷

抽身龍尾外一壑本來心書卷竹陰潤筆牀花氣侵眇
光增魏笏雅趣寓陶琴隱几時搜句忘言兀似瘖

同倪元公善之納涼壽芳

沿塔草軟翠流長境靜蒲荷覺更香清坐小亭叢竹近
暫停團扇受風涼

和友人題唐明皇楊太真對奕圖

風流陣退却圍碁心醉妖妍落子遲還記兵行南詔否
輸贏應不到雙眉

京口甘露寺登眺

吹帽海風鴉背起馮夷知我酒微醺樓臺氣壓金焦浪
鐘鼓聲飛淮浙雲戈甲虎爭餘塊石榛蕪甍嘯幾斜曛
山僧不管興亡事清坐閑披貝葉文

陪守齋至玉湖書院作

天垂大溪碧近樹齊遠山水氣涵野色縹緲亭數間維
昔文節公孤標凜羣姦飄然兩屐齒雲岩遍躋攀此地
足佳致差不遠市闌壽峰

文節次子

顧而喜築屋娛親顏吳

興富臺榭往往携歌鬟公獨抱書來小舟破滷潑花淡

水紋麗鳥啼人意閑讀易發妙蘊不惟評馬班公有易訓馬班

異辭著述五百卷星芒照人寰天街幾綉鞍蹀躞趨豹關

河來砥柱立一老菰蒲灣守文節第四子今右曹郎中領客遊秋

風韻枯管我誦壁間文徙倚辭石斑德人不可見月白

漁舟還

題嚴子陵釣臺

涓濱一叟髮垂素西伯與之無雅故幡然為捨釣魚竿

八極風雲生指顧先生少與文叔遊眼者日角興炎劉
胡為掉頭不肯住垂綸依舊披羊裘周文虛已師賢哲
光武規模欠宏濶三公清坐臺閣尊先生回首桐江月
桐江月色無古今白波蒼嶂幽人心

題村學圖

田父龍鍾雪色髯送兒來學尚腰鎌先生莫厭村醪薄
醴酒雖醲有楚鉗

畢履和惠端硯余以大歛硯報之佐以一詩

履和惠端研玉質馬肝色我有大研卧蚕紋元是新安
龍尾石持以答佳貺聊亦見此心極知不是雙南金未
足報君綠綺琴我得履和硯清潤如履和天然粹德非
琢磨秋江印月平不波

匣上有秋月
澄輝四字

君得剛甫研朴鈍

均剛甫不能輕捷隨人後默默寒窗守愚魯端研入手
喜有餘展開古帖聊學書大硯知君不負渠墨池飛出

北溟魚

畢善作
大字

江湖小集卷十五

欽定四庫全書

江湖小集卷十六

宋 陳起 編

徐集孫竹所吟稿

古意

彼美山中桐千古生清風斲削羅徽弦不費膠漆工伊
石臺有梅月冷雲空濛一彈彈春江遲日春融融再彈
彈招隱霜木吟樵楓三彈彈離騷感慨古道隆太羹玄
酒味旨趣回顓蒙世無子期耳知音未易逢袖手長太

息所聽何不同所聽非不同舉世鄭衛聳

智果寺觀東坡墨蹟參寥泉

煮茗評詩歲月深堂堂遺像篆煙沉數間老屋闕興廢
一段清名無古今碑斷亂雲封字脚并昏落葉覆泉心
斜陽影裏夷猶處仰止高風不敢唵

暇日言事二首

雨苔侵逕客來稀官事纔閒便掩扉歌枕忽生鄉國念
夢中喜得一番歸

西風落葉滿庭除
隱几清吟獨撚鬚
官地莫將私地比
鞠苗也種兩三株

送葉靖逸之維揚

竹西亭下路二十四橋
迂有志風寒地携家雨雪途
杯
酣看玉藥橐重載湖珠
寫就烏絲句無妨寄鴈奴

中秋夜雨

兩年客帝畿
圓月浸秋輝
今夜月圓時
風雨打門歸
年此桂魄不
焰今年客
明月應團圓
只被浮雲隔

觀秋潮

八月西風噓沉瀆長江協候肆澎湃錢塘王氣天所鍾
非為子胥逞靈怪海門三山縹緲青雙練夾岸奔雷霆
蛟龍鼉鼉匿形影銀濤雪浪翻滄溟踏浪羣兒慣行險
出沒波心旗閃閃須臾激灩潮信平蕩漾漁舟千萬點
天低暮靄襲人衣游子興盡各云歸獨有騷翁看不足
吟到夜月揚清輝

江湖偉觀

昔日山中一小亭重新輪奐轉崢嶸著身梯磴千層上
到眼江湖兩派明鼎藥丹成仙已去盃泉墨水猶清
壽星炯炯無今古長焰東南王氣生

聞蚤

獨搔短髮坐更深夜雨書窗半欲陰近日病魔詩思澁
一秋清句付蚤吟

對菊

未能籬下學悠然慚為微官繫日邊造物自憐清俸少

菊花隨地鑄金錢

同杜北山鄭渭濱湖邊小憇

與朋看落葉捨棹踏湖西
埜店傳盃酌殘陽索品題
雲隨波影動山被柳陰迷
一點寒鴉過知他何處棲

看梅

歲寒氣味少人知
一度相逢一度奇
不受陽和私點化
慣經風雪冷禁持
影橫坡老數枝畫
香沁逋仙兩句詩
相對依依吟未得
斜陽歸路不妨遲

公無渡河

公無渡河公無渡河公必欲渡意如何波濤洶湧何足
畏中原未復一身多爭如平地有風波人心之險險於
河

水樂洞

路穿巖竇折羊腸處處亭臺御墨香流水不隨人事去
尚餘絲竹舊宮商

玉清宮初陽臺

守藥胎仙去不來空留山頂煉丹臺
明眸炯炯初陽在知隔人間幾劫灰

下竺看猿

渴泉飲罷過別枝
株守山林得便宜
伸手攫拏竺僧菓
貴遊玩弄如兒嬉
膏粱恣欲甚丘壑
苞苴賸把實囊索
本然無物拋乞與
縱有腥羶醫無藥
勸汝傳侶只依僧
殘齋剩核亦潔澄
切勿自照具人面
便爾忘却當初洞
口呼不應

聞鶴

千年華表竟何榮
曾結孤山夙世盟
午夜露零和月冷
一聲風靜仰天鳴
既歸蕙帳情何怨
不上揚州韻更清
未必湖陰人聽得
聽來好爵謾營營

玉泉看金魚

石沼鑿瓊瑤
金鱗數百條
年深須變化
泉潔自逍遙
網罟難垂手
公卿擬上腰
龍宮依梵法
翻水雨青霄

訪僧不遇

特地尋君選佛場
行行踏遍古苔荒
不因坐石貪搜句
何事抽單輟赴堂
空榻日移懸錫影
別寮風過煮茶香
忙中我為閒來到
君本閒人為甚忙

六一泉

惠勤已蛻老歐僂
物逐人非井便乾
不是坡翁重到此
此泉安得到今寒

金沙井

脩綆垂鉞自汲深水
澄沙瑩幾星金分明
不與貪泉比

莫為金沙起利心

乍晴

吟情天遠倚闌干，聲歇鳴渠雨乍乾。
只為吳山居官舍，却因笋蕨憶家餐。
燕窠出子春游懶，燈燼開花夜話殘。
收拾柳綿囊楮被，麥秋猶有一番寒。

重拜和靖先生墓

秋聲爾許悲懷古，若為思菊老泉堪。
薦山孤草亦萋萋，高風留塑鶴殘。
雨暗荒碑依舊梅，千樹無花香似詩。

竹閣

昔日孤山像重移閣幾春騷名垂句法遺愛稔邦民雨
剝一碑古風搖萬竹新來遊興感慨誰繼若而人

夜過富春

夜舡搖兀當乘槎得與僧俱似出家數幅征帆拋草渡
一團幽夢遶梅花風傳山縣殘更漏潮練霜江淡月華
所恨釣臺眠裏過磯邊不及理漁車

清明

春風客裏動經年寂寞松楸入夢邊斗酒誰為寒食奠
嬾將楊柳插門前

燕子

呢喃不聽一年餘又見雙飛向竹廬翻笑人間湖海客
重來仍占故巢居

訪林可山不值

尋君每自恨遲遲及扣巖扃誤所期空放山間雲外鶴
只吟蓬底雪中詩孤燈歌枕勞頻夢樽酒憑欄定幾時

獨立小橋回首處籬邊猶喜見橫枝

促刺詞

促刺復促刺勸織聲轉劇小婦跣雨採桑歸大姑煮雪
抽絲繹辛勤欲織禦寒衣朝暮惟恐不盈尺織成門外
迫催租不了輸租仍賣綌婦姑對泣兒號寒更無可補
兒衣隙帛暖本擬代綌寒賣綌寒來愈無策促刺兮促
刺兮勸人織兮織何益貯之金屋是何人重重綾錦飾
珠璧

鷺

素狎沙鷗水國盟
一生蹤跡任飄零
謾誇霜雪精神別
難洗蝦魚氣習腥
點破青山成曉畫
飛來紅蓼稱秋汀
江湖出入風波裏
比著胎仙欠典刑

蟬

高蹈槐梢與柳陰
爭鳴直到日西沉
初無識見偏容喙
不讀詩書却好吟
風露細餐雖足飽
山林為計更宜深
所談幸爾非人事
逆耳從來欠賞音

贈相士

好爵縻人見不休更饒君盡許封侯山林朝市心殊相
莫誤平人枉白頭

遺僧楮衾

練從秋水桂華鄉雅稱分供衲子床一段溫和雲共軟
十分明潔月爭光吟窺有夢圓春草禪骨無因怯曉霜
金帳繡衾皆業境此中清趣最深長

可賦軒避暑

萬箇琅玕爽氣浮何妨暫借着詩流世人奔競長為暑
心地清涼即是秋普供茶瓜醒眊自携枕簟足夷猶
從今只有山林好浮世炎炎卒未休

客夢

人生摠摠汨浮榮勘破令人厭宦情竹屋無時勞結夢
秣床何日遂歸畊雨侵藥竈莓苔長秋透書臺筆硯清
漸老鬢毛猶未雪此身猶及見升平

夜雨

夜半倏驚覺狂風攪秋鳴掣電起迅雷驟雨翻盆傾逆
知造物意掣斂萬寶成天威不竟夕須臾山月明

官舍雙桂

翠玉黃金剪綴成幽香不斷襲人清獨披月色連宵看
更結秋風來歲盟好夢偏為蜚叫破吟聲那似蝶飛輕
紛紛凡卉誰堪眼說與寒梅早合并

雨中用進退格

秋來天氣半晴陰塊坐山窓一欠伸欲睡却思妨宦業

怕吟惟恐動鄉心
遠書難準衣仍薄
清俸無多索慣貧
箇種關情畦稻熟
雨宜時降不宜靈

岳鄂王墓

古木號風抱不平
百年忠義日爭明
墳前人馬空存石
何似當時聽用兵

喜鵲寺

鵲巢不見委空枝
透徹機關在險時
自後非無禪可問
多因險處怕人窺

訪詩人

得得訪詩仙平湖水接天身輕如鶴羽路遠買漁船日
上荷撐蓋春深柳脫綿造門人已出冷漱石山泉

湖庭夜坐

片葉秋風數日程爭如天籟未秋聲厭居塵境炎威熾
來納虛亭夜氣清萬點螢光移醉眼一湖蟾影蕩吟情
笙歌寂寂重關掩獨許高僧並臂行

即事

無端梅潦肆鳴渠官舍蕭條似僦居把酒厭談天下事
挑燈頻讀故人書吏抄詩爛多訛字僮治食遲少嫩蔬
濁世炎蒸方鬱鬱庭前新草不令除

挽北礪

本分叅禪學吟中透一闕清名傳北礪遺像在南山石
塔人千古煙梯屋數間詩竟何處覓應伴白雲閒

石屋

路僻鳥關關行吟逐字刪偶來遊石屋却喜見香山閣

峭寒雲護巖深野水閒坡仙留墨在姓字有無間

盃泉

一方石甃溜涓涓扁以盃稱萬古傳名利醉人釀似酒
誰甘恬澹酌清泉

此君軒

此君瀟洒翠團欒軒扁佳名墨已乾欲識清風千古在
試將石刻句吟看

湖西納涼

小艇撐過第一橋，酌泉橋下擲詩瓢。來遊道院分荷供，
擬拉吟僧遣鶴招。暮靄直從漁笛起，月華高過塔燈遙。
且於靜處偷清福，人海驚人湧似潮。

寄題漱玉

一派潺湲迸石溪，直疑寒碧練玻璃。百川流去須歸海，
萬籟喧來有定時。橋接丹山橫夜月，柳籠碧草拂晴曦。
吟廬此去雖相近，爭似閒鷗立渺瀰。

春日訪四聖鄭涓濱

訪舊孤山去桃花觀裏春迎香開道室借酒酌唵人琴
操音還古蔬盤味却真斜陽各分散一水隔紅塵

檐上木香

無奈聲聲杜宇頻木香猶有一分春檐頭分得清香到
却謝尋常過路人

和趙冰巖借宿僧房韻

鷗盟鄉國外替盃把題分旅舍嫌紅日僧房卧白雲
新翻雪乳硯古帶潮紋黜陟人間事棲心耳不聞

中元

今朝逢令節依舊客殊鄉
禪衲同分席清齋若過堂
江茶浮水色葎菜帶山香
忽憶三秋菊誰鋤小徑荒

餞吳西疇東歸

交情寥落若商參誰是如蘭可斷金
別去社中懷舊友喜來湖上共新吟
好山爭似居家看冷菊難禁在旅心
我欲學君歸未得來年竹屋再相尋

習懶

風撼西窓夕照明習成懶散澹無營頗諳讀易深知命
却怕吟詩浪得名欵對山僧開月酒旋蒸湖蟹切秋橙
有來歸自江干客為說錢塘潮信平

送庵僧歸山

微官驅我離家山何日歸休得遂閒先隴陰陰松影裏
春來草草倩師刪

跋竹間僧詩藁

借來香墨本相對坐孤檠句似寒梅好夢從春草生逼

人禪價重喚我宦情輕一事猶相得此君同此盟

歲律

歲律又侵尋桃符句索唵經年為客夢每日在家心眼
老看山慣愁多怯酒深公餘惟讀易世事任浮沉

趙紫芝墓

晚唐吟派續於誰一脉纔昌復已而對月難招青塚魄
見梅如挹紫芝眉四靈人物嗟寥落千古風騷意俊奇
公去遙遙誰可法少陵終始是我師

落梅

春雨敲花逐水流，游蜂催課未知休。
生來獨冷嫌無雪，別去相逢又隔秋。
紫蒂窠窠凝酒恨，蒼苔點點落詩愁。
黃昏未覺師雄夢，塞管一聲何處樓。

冷泉亭

山遠源深絕市聲，許由因此隱方成。
一生獨喜枕流好，萬事何如酌水清。
野衲洗心滋味淡，騷人照影利名輕。
軟紅塵裏渾如醉，誰識斯泉可濯纓。

玉岑

一抹斜陽掛淺林
細聽山鳥說春心
千年古寺多奇迹
讀了豐碑看玉岑

觀音泉

巖石留雲裊翠煙
古松知歷幾千年
淨瓶一滴楊枝水
湧作巖前大士泉

除夕

一歲驚心忽已除
宦遊尚自客西湖
漫題桃板標茆屋

旋買梅花插瓦壺，俸薄幸無賒酒債。官閒却有索詩逋，
明朝萬事從頭起。依舊山肩竹樣癯。

舟中

厭殺人間名利忙，我忘名利只詩狂。雅陪雲衲三生話，
分得漁舟半日涼。傍水細看鷗鷺浴，隔蘆吹過芰荷香。
從容飽遂清遊勝，那似家居卧竹房。

秋風悲

秋風悲，秋風悲，秋風悲。分落葉飛，豪家不識秋風悲。孟

酒暖熟兒女嬉秋風悲秋風悲秋風悲秋風悲今隴極萎田舍
不識秋風悲腰鎌收刈雞豚肥秋風悲秋風悲秋風悲
兮塞角吹戍人不識秋風悲只願封侯不顧死棗紅十
載忘歸期秋風悲秋風悲秋風最可悲今江流滔滔木
黍離離為此悲者其知誰

訪周伯弼後寄

獨坐湖窓水一盃好懷竟日向誰開火雲六月天無夜
不為先生定不來

書瘦巖僧詩卷後

泛湘游嶽慣風寒
怯掛田丈半臂衫
吐出煙雲冰雪句
山肩莫怪瘦巖饒

休日招李山房杜北山訪渭濱秋浦於孤山即

席用韵

凜凜僊風匝封田
徘徊懷古事茫然
眼空湖海無塵累
身在蓬萊有宿緣
孤策遍尋儲鶴地
偏提自汲煮茶泉
詩家眷屬通詩譜
不枉微官客日邊

有感

華陽暫脫戴朝簪，悔被浮雲惹動心。
世事可驚如雨驟，客懷無限併秋深。
能歸不似天邊燕，怯冷愁聞月下砧。
幾許清高堪自慰，官居賴有竹蕭森。

舊圓覺

雲氣濕香埃，門蹊印碧苔。
金奎今日賜，翠輦昔時來。
禪定琴臺廢，詩寒石刻嵬。
萬斯年勝地，不敢肆徘徊。

清溪

不比江湖汗漫流
山林冷淡氣涵秋
泠泠一派源頭水
岸影中間見白鷗

獨坐

老屋蕭條半欲斜
繩床獨坐看蜂衙
經年官况渾如客
計日安書已到家
策策冷風刪樹葉
絲絲暮雨織簷花
夢魂不那歸心切
小圃堪鋤自種瓜

挽孫花翁

清氣散乾坤
人亡名尚存
玉寒埋菖嶺
墨淡慘秦村
井

菊風號塚山花月返魂子孫無處覓
啜客酌芳樽

餞平洲僧

天地一身閒
袈裟裹亂山
聽經離竺寺
結制去雲間
包重懸詩藁
藤枯帶蘚斑
西風梧落葉
應又向西還

雲谷

月浸千林萬壑秋
聽琴驚起鶴回頭
孤雲帶濕藏空谷
不逐人間富貴浮

北高峰

閒處春光淡逢僧共採蒿曲盤山磴嶮直上塔峯高風
露侵衣冷江湖送眼豪近年無隱者空負數株桃

靈芝寺

梵宇背湖光朱橋度綠楊折藤維小艇拂石坐幽房齋
版驚間鷺苔碑卧夕陽都人喧鼓吹未識此徜徉

跋吳西疇東游詩卷

兩袂薰風過傳廬鷗盟又結向西湖東游雙幅雲煙句
寫出江心鴈蕩圖

湖上

不分雨色共晴光
每攬吟魂夢草塘
數日不來湖上看
西風次第水蒼茫

借林可山韻餞錢蘿屋僧

吟卷多題品君齊
賈島才聞風知竹
瘦載雨過湖來交
淡盃中水儒酸葉
底梅便辭京口去
覓取近詩開

杪歲

幾多風月費招邀
傳舍侵尋一載僑
客久夢魂安澹泊

歲殘老態厭喧囂
晴空雪片飄梅瓣
冷地春光上柳條
世事每從兒戲過
門前歌舞又元宵

聽雪窓

靜擁寒爐逼硯冰
凍蠅怪有撲窓聲
拋松撒竹清眠思
吹滅唵燈坐到明

寄懷里中諸社友

自笑初無作吏能
却因作吏遠詩朋
與君交訊欠逢雁
知我懷人獨是僧
客枕夢殘聽夜雨
鄉心愁絕對秋燈

何時歲老梅花下石鼎分茶共煮冰

贈黃羽士

閑披鶴氅紫藤冠帶得林泉骨相寒落魄一身風雪冷
飄蓬千里水雲寬素餐洗硯抄詩句清夜敲鐘上醮壇
準擬學僊僊過否何年煉就九還丹

寄詩僧

昔日剡溪曾載雪君今訪我以晴期一庭楳雨何時竟
嗔得詩來舉似誰

惜春

輕寒測測雨絲絲
獨坐吟床日較遲
方此惜春容易老
晚風吹落野棠梨

酬雲間僧見寄

一從湖上別無處
問相知幾夜頻馳夢
今朝忽寄詩山
昏雲過濕院靜鶴歸遲
此去秋風近應須動客思

謝林可山序詩

不枉西湖住兩年
窮吟活計又成編
生平不得春風力

只與梅花結得緣

送僧之毗陵

無意坐林叢雲飛天四空
禪心包影外客夢艣聲中
勝負機何密窮通莫儘工
此行應不錯知遇有詩翁

雨作

薰風入斷籬猶自雨淒淒
數日無人過終朝共鶴棲
雲濃山寺失水泛板橋低
亦有田堪秣何時得荷犁

為瘦巖僧題西山爽氣

背却殘陽翠欲流一窓長占四時秋逼人風露衣巾脆
拄笏朝來獨倚樓

紫笑

雨濕晴烘乃破慳時聞旖旎度簷間不知失笑緣何事
每對薰風自赭顏

客懷

衣袂半埃塵堪嗟白髮新古今同逆旅湖海未歸人雨
霽船爭渡花飛鳥怨春片雲千里迥日日謾烹鱗

月夜泛湖

買得扁舟載月明
喜它簫鼓已歸城
一襟風露清
陰骨
四望湖山見道情
花港採苓供果釘
蘋洲擷荇薦盃行
此歡不許人多得
破曉西村雞犬鳴

靜中

靜中白日十分遲
喚起鄉心怯子規
客味有如盃水淡
宦情肯被一塵縈
緝儲餘粟緣供鶴
俸乏零金為買詩
坐久不禁春雨暗
誰家樓上笛頻吹

午夢

篇詩纔欠急忙償似有奚奴督和章望斷曉山雲破碎
驚回午夢雨淋浪春光一半歸楊柳花事三分屬海棠
靜坐小窻人語寂閒聽梁燕話行藏

蝸牛

分岐頭角出於天盤泊委蛇巧並緣到了升高翻墜失
徒然陰地肆垂涎

末利菊

瑤華細簇翠蘆纖耐得離邊曉露淹晚節清香猶更好
雖名末利不趨炎

杜北山同石峰僧來訪

梅花同伴瘦一瘦有誰過歲事那堪晚心期未易多杯
深和月吸硯冷帶冰磨山暝歸鴉急相分獨奈何

謝偃溪惠索洵

與客敲詩倚古松亂蟬聲裏夕陽舂幾年飯顆山頭瘦
槐葉今朝得飽供

題贈命士

富貴功名世競癡
清吟往往不趨時
請君多莫公卿命
莫要逢人舉似詩

挽靈隱僧珏月窻

秋月只清輝
窻明人不歸
嘔心成宿病
蛻骨悟前非
書偈辭禪院
緘衾寄母闈
猿啼泉石冷
客淚為君揮

牧溪上人為作戲墨因賦二首

宿葦臨流去就輕
生平慣與爾同盟
相從奚假歸圖畫

特畫江湖一段清

右鷺

峭壁懸崖隱趣深
每來洞口費呼尋
啼雲嘯月聲難寫
只寫山林一片心

右猿

酬里中友人代簡韻

鬢絲冉冉負年華
客夢無時不在家
吟得新詩三百首
却慙離下見黃花

古樂府

郎別二十春未報淮頭捷空房守節心羞見雙胡蝶
滴淚寫臙脂欲寄南鴈羣恐蕩郎客思封了却還焚妾甘
奉姑老妾甘育子揮它日畫錦歸願郎無棄置

言事

讀了南華枕曲肱無端客夢冷偏增官將滿去多逃吏
詩不吟來少寄僧亂葉打窻猫上案斜陽過屋鼠窺燈
孤山在望何時雪問訊梅花策瘦藤

挽李山房

吟譽先君者多埋葛嶺傍幾年千里客一夕九原傷琴
硯遺兒遠棺衾得友償玉樓天上事應有舊山房

鄭渭濱過訪而杜北山諸友繼至惜乎招石峯
月溪二禪不來

未見南枝與北枝一清誰可話襟期不嫌添客重行酒
所欠惟僧共說詩竹影因風和雀動水聲帶雨啟鷗疑
黃昏緊閉寒扉坐自展韋編對伏犧

采蓮曲

朝露濕妾衣暮霞耀妾矚一葉小如瓜
去住無拘束兀棹歌採蓮襲襲薰風足
蘆葉映港清捉對鴛鴦浴蓮中有苦心
欲折手還曲折蓮恐傷藕藕斷絲難續

菊

寂寂東籬姿淒彼霜露濕不肯出春風
俗眼豈相入世無陶靖節此趣誰收拾

蘭

淡淡九畹質雅好住山林幽香不求知伯夷叔齊心世
道不復古紉佩取騷吟

自君之出矣

自君之出矣蛾眉不復掃寶鑑委埃塵玉容為誰好

堅冰

滕六巧呈瑞平白一尺高霜風凜烈生挾夜聲如號冰
澌條玉筍瓦縫鏡銀膏昨屋頡暴富掩映何奢豪晶光
動閭里健羨等兒曹此時輕脆資堅為千載牢一旦陽

明升消泮茂纖毫奚獨此為然世事亦涓涓

閑賦

梅花白向鬢根生歲月蹉跎事欠成讀過故書溫有味
借來新絮冷無情未霜山寺昏鐘勁欲霽湖亭夕照明
多少紅塵留滯客可曾歸去力春畊

渡湖

漠漠西湖匝野烟夕陽柳下買歸船關心一紙平安報
鴈字縱橫寫碧天

官舍亭前古梅尋常開
枹歲暮余整歸裝而乃
蚤花不容自嘿

猗猗古怪虬龍枝
着花傳舍逼歲晚
往往來來幾番人
老大相期疑未諼
顧我老眼慣相看
嗅花嚼蕊當餐飯
橫斜峭拔彫雪霜
肯媚陽和齊婉婉
把酒邀月共說詩
疎影上衣成繾綣
朔風吹夢入家山
鼓舞倦矣客兮返
誰謂花先常歲期
徹夜萬葩玉一本
花應有心餞我行
吐芳非為冬日煖
我亦逆知此花意
孤潔難與俗人混

似嫌托根富貴場不若棲身山林穩惜乎花又不能言
一花一心誠懇懇任他世間競酣桃李春花獨與我結
交歲寒遠

秋胡行

五年行邁兮歸遲遲採桑山陰兮奉親慈冰霜自潔兮
清節持有客遺金兮志不移索有金兮益專為母馳心
悅桑女下車兮人可知庭中見妾兮徒忸怩載思往事
兮妾心悲恐君不如妾之有節兮言姑已而君不知孝

兮人道衰妾不死兮欲何為

賦雪

漫天飄瑞歷囂塵一夜西湖幻出銀煎入茶鐺清腑肺
吟歸詩句爽精神糝填鶴跡看旋沒封合梅花認不真
茅舍竹籬猶富貴長安安得有貧民

寄里中社友

欠作故人書侵尋半載餘窮吟雖自各入夢不相疎梅
蕊通春信霜風促歲除待余歸故里鷗約復如初

孤山訪鄭渭濱不值

寂寞石琴臺香雲撥不開
多知騎鶴出自欲買舟來
葑岸春回草山亭雨謝梅
懷人成悵惘日暮惜空回

江湖小集卷十六

欽定四庫全書

江湖小集卷十七

宋 陳起 編

陳允平西麓詩稿

秦鸞曲

盈盈白玉鈿
裊黃金縷
拍拍水晶匳
皎皎珊瑚樹
簾前雙燕飛
門外桃花雨
無處說相思
羞對秦鸞舞

登吳山

登高一展眺
宮樹鬱嵯峨
樓閣春風滿
東南王氣多
青

天行日月大地布山河柳色沙隄路時聞響玉珂

明皇按樂圖

日日霓裳宴綵樓三千歌粉侍宸旒月明宮殿雙龍伏
雲擁蕭韶九鳳游翠袖半籠金約臂寶釵斜墜玉搔頭
不知舞到弓彎處一拍春風一拍愁

鄂王墓

鄂王墓在棲霞嶺一片忠魂萬古存鏡裏赤心懸日月
劍邊英氣塞乾坤蒼苔雨暗龍蛇壁老樹煙凝虎豹旂

獨倚東風揮客淚不堪回首望中原

賀伯父大資休致

不戀清時白玉璫便將身世寄滄浪
三朝元老黃樞閣四海閑人綠野堂
楚楚菁蘭秋帶雨蕭蕭寒菊晚宜霜
擬成東角耆英社賸樂壺天日月長

送中上人遊天台

師作天台去長亭復短亭
焚香叅祖塔振錫動山靈
石罅移苔歇松根斲茯苓
何時白雲下相與話青冥

寄王尊師

綵雲繚繞七香車
洞裏神仙煉紫霞
華表鶴歸春寂寂
東風吹盡碧桃花

過田家

村南啼布穀
村北響縑車
隔浦賣魚市
傍橋沽酒家
野花朝日煖
溪柳背風斜
又過東隣去
東隣採菊芽

秋暮登太白

飄飄短褐袍
倚杖立金鰲
橋束溪流急
樹增山勢高
白

雲連海嶠黃葉滿亭臯落日西風惡塵埃兩鬢毛

雪

樓臺萬瓦玉鱗鱗遮盡人間富與貧可笑世間剛道冷
不知片片是陽春

觀奕象棋

陣勢頻分合機鋒互應酬馬飛關塞月砲落漢天秋不
問知心友翻成靚面讐誰能勞勝負獨立大江頭

香奩體

小院薰風滿閑庭白晝長蜻蜒楊柳岸鷓鴣芙蓉塘雲
合朱簷卸山高翠閣涼蔓滋青薜荔芽長紫良薑簾幙
深深地闌干曲曲廊淡煙瑤草細流水碧桃香播影重
門靜苔痕小篆荒螭盤丹鼎雪龍吸露臺漿琴古翻新
調笙沉艷舊黃雨聲犀角枕月色象牙床掌上雙鸚鵡
屏間兩鳳凰石函藏寶劍金鑰啟瑤箱扇雉團清影匳
鴛試曉粧霞綃衣窄索雲錦佩玎璫鬢攏金蟬蠹釵橫
玉燕翔袂飄天水碧裙裾濺鬱金黃太液蕭初遠蓬壺漏

未央流星飛碧落零兩下銀潢去去人千里迢迢天一
方斷腸春洛浦殘夢夜瀟湘

侍謝立齋小酌湖樓

風捲珠簾客珮清杜鵑啼老送春聲水浮亭館花間出
船載笙歌柳外行千里夕陽歸夢遠六橋飛絮馬蹄輕
欄干倚遍暮天濶煙樹一鈎新月生

題李丹壺壁

閑乘海上槎來訪謫仙家風逆磬聲短日低幡影斜猿

攀高樹果蜂採半巖花誰在丹臺上三更煉紫霞

謁烏龍廟

斷碑猶紀唐時事山氣陰沉暗綠苔松木已逾千歲壽
香煙知化幾爐灰廊深無月鬼神過殿古有雲風雨來
曲曲九溪春水落子陵灘下復東回

即事

重重簾幙燕翩翩塵鎖朱樓十四弦榆火漸催寒食節
海棠花畔縛秋千

春詞

楊柳春風三月三
畫橋芳草碧纖纖
一雙燕子歸來後
十二紅樓捲繡簾

江南謠

柳絮飛時話別離
梅花開後待郎歸
梅花開後無消息
更待明年柳絮飛

嘆鏡詞

憶妾初嫁時
金屋藏窈窕
忽見長安人
鬻鏡長安道
明

月掌上寒團團復皎皎千金買得歸惜之如重寶
匣開雙鳳飛帶結青鸞裊當時照妾顏妾顏正年少如今照
妾顏妾顏羞已老對鏡頻嘆嗟掩鏡徒懊惱不恨妾嫁
遲惟恨妾生早此恨空綿綿天涯滿芳草君不見長江
逝水無逆流歲去年來多白頭

登招寶山

宇宙初開闢何神立此山中流天柱石大地海門闕浪
惡蛟龍怒雲深虎豹閑潮期與日月千古一循環

秋夜遊東墅

雲壓高空鴈陣低
江城歷歷草離離
樓臺秋淡玉簫遠
簾幙夜寒銅漏遲
明月鷺鷥菱葉浦
西風蟋蟀豆花籬
一樽酒盡銀河落
猶有殘鐘出古祠

春遊曲

長安二月東風裏
千紅陌上香塵起
都人懽呼去踏青
馬如遊龍車如水
兩兩三三爭買花
青樓酒旗三百家
長安酒貴人未醉
岸頭芳草日半斜
誰家女子嬌似玉

約莫青春十五六，鬱金羅帶蘇合香。琵琶自度相思曲，
相思曲聲斷續斷續迴，丈不堪讀迴丈斷續有續時。離
腸寸斷無續期。

春閨怨

妾家住在湘江曲，門枕湘江春水綠。年年長是暮春時，
兩岸垂楊啼布穀。自君話別湘江頭，獨上層樓彈箜篌。
娥眉不掃遠山碧，滿隄芳草春正愁。舉頭不見君，但見
湘江雲。江雲散復聚，妾心空如熏。舉頭不見君，但見湘

江水江水去復回
妾顏為誰美
湘江雲湘江水
雲水悠悠
悠何日已舉頭
望君君未歸
門前楊柳空依依

野人家

遶江生杜若
滿地長辛夷
剪草塗新壁
寒藤縛舊籬
瓦瓶春貯酒
土竈夜蒸藜
獨步歸來晚
東臯雨一犁

遊陽明洞天

萬木陰沉鎖石門
煙霞深處近崑崙
峯洞簫聲接玉臺
磬寶蓋影搖金殿
旂湘浦有龍雲
氣濕越山無鶴
露華昏

靈芝採盡歸何處
溪上白蘋花正繁

哭樓梅麓

白玉樓成去作文
祇從西棘掛朝冠
生來病苦相如渴
沒後人知范叔寒
野店春閑沽酒榼
溪堂月冷釣魚竿
梅花麓上誰彈淚
歲歲東風吹不乾

宮詞

三十六宮春漏長
隔簾時送御樓香
倚籠盡日教鸚鵡
為我君前說斷腸

無題

閑拈紅葉欲題詩
待得詩成又懶題
心事不隨流水去
月明人在赤橋西

題胡月山唵屋

蘇公隄上路日日課新唵
流水行花影斜陽卧柳陰
斷橋春聽樂矮屋夜鳴琴
皎皎山門月如君一片心

有所思

憶昔美人初別時
長亭兩岸柳依依
今日美人天之涯

美人美人胡不歸憶昔君別妾分破青鸞鏡破鏡如破
心與妾表相憶相憶圖久深憶昔妾別君剪斷金鳳釵
斷釵如斷腸贈君表相思相思圖久長一日一日復一
日青鏡鸞孤釵鳳隻未必君相思能如妾相憶寒衣剪
就欲寄君長安門外無行人鴈聲半夜西風惡窻前一
片梧桐落

觀猿

掛石攀雲日半斜亂山深處飽煙霞香林月滿僧歸去

啼落春風幾樹花

失鶴

頂上新成九轉丹
啣花日日到詩壇
夜深飛上雲霄去
華表月明風露寒

宿大慈山悟真觀

終南道士學彈琴
門外松蘿鎖翠陰
瀕海八龍朝出洞
隔山羣鹿夜歸林
琪花過雨金風淡
玉樹籠煙璧月沉
三十六壇鐘鼓寂
雲璈聲接步虛音

寄翁賓賜

歷歷長途謁魯侯，征塵寧復戀貂裘。
江城露冷霜初滑，梅谷冰消水欲流。
夜月觀書徐搦榻，春風聽樂仲宣樓。
料君頻作西湖夢，曾憶孤山有舊游。

下第懷樓壽朋

百尺丹梯擬共登，共登天上最高層。
南山有霧空藏豹，北海無雲可化鵬。
勲業十年塵裏鏡，詩書萬卷雨前燈。
桃花開盡不歸去，又逐春風過武陵。

別何橋潭

駐馬赤欄橋餘寒著柳條舟車富陽路風雨淞江潮惜
別津亭暮思歸故國遙臨行莫惆悵回日定花朝

有感

軟紅塵裏度韶華楊柳橋邊舊酒家燕子不歸春漸老
東風開盡拆桐花

暮春

柳外宮鶯轉晚寒萬花開盡正春殘沉香亭北欄干曲

獨抱琵琶看牡丹

終日

終日懷人凭曲欄
餘陰未放客衣單
祇緣二月風光澹
別作一般天氣看
梅粉有香銷
夜雨柳絲無力受春寒
閑情漠漠難拘管
自逐輕鷗下急灘

過釣臺作

雙臺屹屹幾春秋
千古高風一釣鉤
越嶺有雲山北障
桐江無浪水東流
雪深黃葉埋寒虎
煙煖青莎卧白鷗

漢業已隨宮樹老月明常到客星樓

春閨

寂寞梨花院落閑遠山愁入兩眉彎黃金絡索珊瑚墜
獨立春風教白鵬

倚樓

金虬熏盡鷓鴣斑獨上層樓倚畫欄滿院梨花香寂寞
隔簾風雨正春寒

嚴陵郡舍

花飛石上斑水落白雲灣
簾捲千重樹牕開四面山
鼓聲魚市近旗影訟庭閑
滿目皆吟思殘陽縹緲間

西興

西興潮半落漁浦日初昏
嶽面雲收腳沙頭浪積痕
樓鐘鳴野寺船鼓入江村
回首長安路歸心幾斷魂

曹娥廟

漢碣嵯峨幾百秋
曲墳遺廟越山頭
潮聲浸帳鳳屏冷
雲氣遶臺鸞鏡愁
孝節稜稜雙檜立
哀魂渺渺一江流

椒觴載奠靈風起知我懷親送遠舟

梁湖道上

東風酒旆斜浦口第三家
谷鳥鳴春樹江鷗起暮沙
故鄉山漸近曲岸柳初芽
客路歸心切孤帆帶落霞

閨情

閑拈花片貼紗窻繡幙斜
飛燕子雙細數歸期相次近
倚樓日日望春江

梅梁堰

廟近雲濤觀山遙翠欲重祇因溪上木便是洞中龍堰
折潮歸海樓迎浪答鐘斷碑荒蘚合終古載靈蹤

虎丘即事

西風劔珮輕獨立妙高亭山吐巖頭月江涵水面星石
奔蒼虎勢樹結老龍形何處吹簫客扁舟過洞庭

青龍渡頭

天濶鴈飛飛松江鱸正肥柳風欺客帽松露濕僧衣塔
影隨潮沒鐘聲隔岸微不堪回首處何日可東歸

仲冬南樓野望

繡幙香溫生暮寒
淡煙漠漠水漫漫
吟殘庾嶺梅千樹
夢遶湘江竹萬竿
風捲亂鷗棲古塔
雪迷孤鴈落前灘
一聲玉笛人何所
更上南樓獨倚欄

夜泊

停舟野渡頭
客路恨悠悠
葉落風千樹
鐘殘月半樓
蘆花雙過鴈
莎草獨眠鷗
山鬼燒青火
飛來照髑髏

梨花

流鶯偷入未央宮
望斷昭陽信不通
寂寞雨聲寒
食夜一枝香
淚泣東風

賦林景參梅嶼

結廬分得雁山雲
嶼上梅花是四隣
水月一天鄰世界
冰霜千古玉精神
短檠夜雨西窗夢
長鈇秋風北塞塵
我亦煙波綸釣侶
與君同作歲寒人

懷潘鄮屋

洛陽纔解珮
過眼忽秋分
四海一明月
千山共白雲
鴈

煙迷曉樹蟲露濕香芹滿紙相思字臨風欲寄君

吳江道上

夜半扁舟出洞庭客帆初掛早潮平社風纔起海鷹至
嵐露未收江鵠鳴吳岫亂雲擊古塔楚皋寒葉擁荒城
垂虹橋外天連水無限別離生杜蘅

登西樓懷湯損之

楊柳飄飄春思長綠橋流水遶官牆碧雲望斷空回首
一半欄干無夕陽

吳山雪霽

九宮闕春風滿陸地樓臺
夜月寒鐵笛一聲吹鴈落
片雲不到玉闌干

后土廟

塵擁粧臺翡翠翹瓊花開盡
玉魂銷崑崙山上天風落
二十四橋吹洞簫

湖上

流水斷橋邊笙歌擁畫船
日酣花半醉春困柳三眠
策

杖登雲洞觀魚上玉泉鳳城歸去晚山鎖萬重煙

西湖暮春

雲山疊疊樹重重浙水迢迢客夢中啼鳩數聲春去日
落花滿地夜來風松闕鶴立吟壇靜竹院僧眠文室空
明日馬蹄何處所夕陽芳草畫橋東

山房

軒牕四面開風送海雲來一陣催花雨數聲驚蟄雷蝸
涎明石甃蟻陣遶山臺此際衣偏濕熏籠著麝煤

馬塍道上

閑拖瘦竹筇獨步馬塍東
鳥影青山外春愁碧樹中
麥潮風化蝶櫻熟雨生蟲
莫過谿頭去谿頭多落紅

遊僊曲

中秋月正明夜半飛紫瓊
拂袖天上去攬衣朝太清
縹緲黃金闕迢迢白玉京
離離百寶幢裊裊九華旌
簫韶起碧落散花飄羣英
翱翔鸞鶴舞清徹雲璈聲
凌凌九霄寒風露薄青
冥弱水三萬里僊路眇蓬瀛
不赴瑤池

宴相約董雙成吹笙騎鳳凰飛上芙蓉城

戍婦

梧桐葉落鴈來時見說沙場未解圍
夜夜燈前做針線倩誰邊上寄寒衣

過姚秋江釣磯

莎草離離碧樹閑祇疑曾是子陵灘
槿花籬落蟲聲碎蘆葉汀洲鴈陣寒
江上浪平潮正熟渡頭人去月初殘
夜深不管蛟龍睡獨對西風把釣竿

已酉秋留鶴江有感

賓鴻幾過澱山湖
夜夜西風轉轆轤
首宿草衰江館靜
枇杷葉老石泉枯
曲終明月閑歌扇
病去寒灰滿藥爐
客夢不堪千里遠
故園籬菊正荒蕪

經馮將軍墓

同山半白雲
此地葬將軍
香火空遺像
朝廷紀舊勲
鐵衣懸古塔
金鉞鎮荒墳
一澗清冷水
年年生紫芹

江村

草舍蔬畦遶柴門竹迳通斷雲遮落日細雨濕斜風野
艾抽花碧山茄帶葉紅煙深南浦遠難認楚江楓

江館野望

江邊鴈過秋江上暮雲愁嶺曲山迴轉潮回水逆流亂
莎行石蟹殘荻卧沙鷗黯淡三更月何人獨倚樓

暮秋遊虎丘

寂寞虛廊暗草萊天風繚繞寶華臺江空露冷蛟龍伏
殿古雲深鸛鵲來山館老松牽綠蔓石壇芳桂落蒼苔

寒鐘敲斷楓橋月半夜禪僧入定回

小樓

寒空漠漠起愁雲玉笛吹殘正斷魂寂寞小樓簾半捲
鴈煙蛩雨又黃昏

侍趙別駕宴壽樂堂

別駕移樽宴草堂四軒簾幙捲斜陽芰荷香滿鴛鴦宿
楊柳陰濃翡翠藏風過水亭秋尚熱月侵山閣夜偏涼
更闌酒盡不知去坐看曉星飛玉潢

留鶴江有感

抱玉歸來淚滿襟，世間何許覓知音。此生雖有啞膺悔，
到死終無嘗膽心。伏櫪馬思雲路遠，避鈎魚隱石潭深。
故人若問淞江客，自採芙蓉學楚吟。

送吳松溪過淮

鐵硯毛錐未策功，又携琴劍過臨邛。荆山有玉鳴朝鳳，
滄海無珠走夜龍。浦口月來僧館榻，渡頭霜落客船鐘。
自君別後知音少，空憶鴈山溪上松。

送趙知縣歸天台

自是中朝柱石材西風塵土暗蒿萊
河陽縣裏花初放彭澤門前柳未栽
準擬鳴珂來鳳沼徘徊抱玉下烏臺
明朝琴鶴歸何處三逕故園多綠苔

姑蘇館

楚岫高低接太行吳江渺漠下滄浪
秋城霜滿葦花白夜館月寒莎草黃
芳苑鹿臺初解珮故宮鸞閣尚鳴璫
五湖一葉扁舟去十二西樓幾夕陽

雲間洞天

門掩青松間綠槐
一匱圖畫自天開
朝霞煉藥黃金井
夜月吹笙白玉臺
樹老有枝皆薜荔
地閒無處不莓苔
數聲野鶴驚殘夢
疑是神仙出洞來

採桑行

妾本秦羅敷家住曲江曲
門前楊柳青春風啼布穀樹
頭桑初芽家蠶始浴相呼出採桑
採桑如玉屈曲迴高枝攀條剪柔綠
朝晴採桑南暮雨採桑北採得桑

歸遲小姑怨相促陌上綺羅人問妾眉何蹙妾恨妾自知問妾何所欲消磨三十春漸喜蠶上簇七日收得繭百斤十日繅成絲兩束一絲一線工織成羅與殺百人共辛勤一人衣不足舉頭忽見桑葉黃低頭垂淚羞布裳

對燭

忽憶巴山夜西窗風雨寒自憐清影獨誰識寸心丹草長花猶在香消淚不乾海棠貪睡去惆悵五更殘

春曉

曉風獵獵捲芭蕉
簾幙深深燕子巢
十二畫欄都倚遍
一雙蝴蝶上花梢

侍趙開府夜宴

賸陪華佩醉蟠桃
楊柳飄飄拂午橋
夜月樓臺行錦障
春風簾幙拂紅綃
歌傳香苑黃金縷
樂奏梨園紫玉簫
銀漏滴殘珠履散
踏花歸去路迢迢

雷峰少憇

倚塔看明月寒光度玉繩曲堤藏小艇疎柳見孤燈水
竹映苔石巖花綠澗藤香雲吹散後猿鶴伴高僧

錢塘旅舍

雲山千萬疊身事恨悠悠客鬢秋風急鄉心夜雨愁蛩
鳴隣寺壁鴈過隔湖樓目送千帆遠長江空自流


避暑

避暑入林扃同僧坐竹亭鳥飛晴地影龍掛雨天形掃
葉鋪椰簟臨流注石瓶更無塵跡到日落夢初醒

山中吟

平生獨愛山日日頻躋攀自得山中趣結廬萬山間
西茂林麓中有盤旋谷飄飄雙鳳凰飛立山上玉日出
華山陽月出廬山崗巫山雲漠漠雁山煙蒼蒼東望泰
嶽松西望蒼梧竹知心侶樵漁忘情友麋鹿山深春亦
寒野鳥聲綿蠻山花隨處發香風吹幽蘭夏日飛火雲
枕葦訪深僻坐此松竹林冰泉嗽寒日西風涼蕭蕭鴈
過秋空高時有巖桂發落葉飛長皋三冬氣凜冽獨立

千崖雪橫斜溪上梅影落溪橋月身在此山中閑情薄
太空行歌白雲裏白雲連崆峒朝餐山上霞暮採山下
藥安得山中人共跨山頭鶴



江湖小集卷十七